



UPA 2026/14

22/4-2026

Justus Hansen

## **Nunanut Allanut tunngasutigut naalackersuinikkut ingerlatsineq pillugu nassuiaat 2024-2025**

(Nunanut Allanut, Inuutissarsiutinut Aatsitassanullu Naalackersuisoq)

Nunanut Allanut tunngasutigut naalackersuinikkut ingerlatsineq pillugu nassuiaat 2024-2025-mik Naalackersuisut saqqummiussinerinut qjanaq.

Nunanut Allanut politikkitigut inissisimanerput imaannaangilaq. USA-mi pisoq nalornilersitsiinnarani nunatsinnut, siunissatsinnullu nammineq aalajangiisinaassuseqarnitsinnut tunngaviusumik apeqquteqalersitsivoq. Kalaallit Nunaannik aqutsiniarneq amerikap tungaaniit oqaatigineqaqattaartillugu, tamanna oqaasiinnaangilaq. Tamanna pimoorulluinnartariaqarparput.

Issittoq aamma Kalaallit Nunaat nunanit assigiinngitsunit soqutigineqaleraluttuinnartut ukiuni makkunani takusinnaavarput. Imminermini nutaarsiassaangilaq, massakulli erseqqinnerusumik, sakkortunerusumik, toqqaannarnerusumillu pilluni. Pissaanilissuit inissinniarsaralutik, uagullu maani soqutigisanut uagut nammineq pisariaqartitatsinnut, kissaatitsinnullu aallaaveqartuaannangitsunik sammineqalersinnaalluta, nunat tamalaat akornanni politikkitigut anneruniuttoqarpoq.

Sunniiniarneq eqqarsaatigalugu taamatulli ippoq. Nalornilersitsinissamik, innuttaasunik avissaartuutsiniaasunik, inuiaqatigiinnitsinnilu tatiginninnermut ajortitsiniaanissamik siunertaqarlutik sunniiniarnerit ingerlarpasipput. Imaannaangilaq. Tamannalu uagut politikkerisut annertuumik pimoorullugu, annertuumillu akisussaassuseqartumik isigisariaqarparput.

Uppiasuussanngilagut. Isumaqaassanngilagut uagutsinnit ungasittorsuarminnaq pisut. Killuanik sunniiniarnerit taamak ittut inuiaqatigiinnitsinnut, politikkitsinnullu aamma annguteratarsinnaapput. Taamaattumik mianersorluassaagut. Pingaartitagut, inuinnaat oqartussaataaernerat, ataqatigiinnerpullu aalajangiusimassavagut.

Taamatut pisoqarnera iligisagullu ikioqatigiinnissarput Demokraatinut qitiulluinnarpoq. Uagut angerlarsimaffipput, kitaani suleqatigiiffiuvoq. Ataqqinninnermik, tamat oqartussaaneramik, ataatsimullu pingaartitanik aallaavilimmik EU-mi, NATO-milu suleqateqarpugut. Nunarsuatsinni eqqissiviillioortumi taakkunani allanngujaassuseq ippoq.

Ilutigisaanik Kunngeqarfimmi ataatsimoornissarput aalajangiisuuvoq. Piffissami avataanit ilungersunartumik inissitaalluni ataqatigiinnissaq toqqagassaanani pisariaqarpoq. Immitsinnut tatigisinaasariaqarpoq, suliniutigut ataqatigiissaarsinnaasariaqarpoq, tunngaviusumillu pininnaatitaaffigut



unammillerneqartillugit ataatsimoorannaasariaqarluta.

Ataatsimoorannili imaangilaq unittoornerusq. Suleqatigiinneq imaangilaq pinngitsuuisinnaanerusq.

Kalaallit Nunaanni nammineq aalajangiisinnaassuseqariartuinnarnerput sulii ingerlatiinnassagipput, Demokraatitit oqaatigissallugu aamma taamak pingaaruteqartigaaq. Oqaasiinnaanngitsumik, politikikkulli siunnerfilimmik. Inuiaavugut nammineq oqaluttuassallit, nammineq oqaatsillit, namminerlu kinaassutsillit. Allat oqaluttuarnerni immikkut taatsiaannagaangilagut. Uagut nammineerluta oqaluttuatsinni pingaarnertut inuttaavugut.

Taamaattumik nunanut allanut politikkimut tunngasunut tamanut Danmarkip peqataajuaannarnissaa isumassaqaangilaq. Nammineq niperput atorlugu uagutsinnut tunngasunik oqaaseqarsinnaanerusaaq. Nammineq atassuteqalersinnaassaagut, namminerlu ineriartornerput akisussaafiggalugu. Imaangitsoq kisimiissagatta, kisianni nammineerusukkatta.

Ataqqinnineq pineqarpoq. Imminut ataqqineq pineqarpoq. Inuiaqatigiittullu pisinnaanitsinnut, pisinnaanerunitsinnullu upperinnineq pineqarpoq.

Tassunga saqikkiartoreersugut nassuiaammi qujanartumik aamma takutinneqarpoq. Niperput nunat assigiinngitsut akornanni tusarneqarnerusarpoq. Nunat allat uagutsinnut toqqaannartumik suleqateqarusupput. Sinniisoqarfigut matunik ammaapput, ataqatigiinnernik pilersitsipput, isummagullu nunat assigiinngitsut akornanni eqqartuinnerni ilaanissaat qulakkeerlugu.

Minnerunngitsumik issittumi suleqatigiinneq eqqarsaatigalugu. Piujuartitsinissamik ineriartortitsinissaaq, avatangiisunik illersuinissaaq, inuunermilu pitsaanerusunik atugassaqaarnissaaq issittumi ingerlatsisut allat peqatigalugit anguniarlugu Issittumi Siunnersuisoqatigiit oqalliffiuvoq sulii qitiulluinnartoq. Suleqatigiinnerup taassumap ingerlaannarnissaa, suleqatigiinnermilu eqeersimaartumik aamma ersittumik inissisimanissarput pingaaruteqarpoq.

Ilutigisaanik nunat killeqarfii akimorlugit Inuit akornanni suleqatiginneq nukiuvoq, minnerusutut isiginngisaannagassarput. Ataatsimoorussamik kulturereput, ataatsimoorussamik oqaluttuarisaanerput, Issittumilu inuunermik paasisimaqatigiinnerput immikkut ittumik tunngavissiiuvoq. Tunngavik uagutsinnut pingaartitaaginnarani, nunat tamalaat akornanni aamma tusarnaarneqartoq. Suleqatigiinneq inuttut, kulturikkut, politikikkullu pingaarutilik.

Nunat avannarliit suleqatigiinnerat aamma pingaaruteqarpoq. Tatiginninnermik, ataatsimut pingaartitaqarnermik, nunallu akimorlugit ileqqoralugu nukittuumik suleqatigiinnermik aallaavilimmik ukiorpassuarni ataatsimoornermut akuunikuuvugut.

Kisiannili aamma unneqqarilluta oqartariaqarpugut, uagut aamma Nunani Avannarlerni nunat imminnut



aquttut allat ukiorpassuarni tusaajumaneqartarsimanginnatta. Akulikippallaanik peqataatinneqarata aalajangiisoqartarsimavoq, akulikippallaarujussuarmillu isummagut allat aqqutigalugit anggunneqartarsimallutik. Tassa aalajangiiniarnerni peqataatinneqarneq ajorpugut.

Tamanna ingerlaannarsinnaangilaq.

Sumiiffinni aalajangiiffiusuni Kalaallit Nunaanni nammineq oqarsinnaasariaqarnitta, aalajangiinerillu peqataaffigineqarnissaannut piffissami aalajangiilluinnartumiippugut. Naligiimmik suleqatigineqassaagut. Naligiimmik pineqarneq nammineq pineq ajorpoq. Kimigiisiutigineqartarpoq.

Qujartumik siumut alloriaateqartoqarpoq. Suliaq aallartinneqareerpoq, allaanerusumillu aamma ataqqinninnerusumik akuutinneqarnissaput pillugu nassuerutiginninneq annertusiartuinnarluni. Kisianni aallartitsineq kisimi naammanngilaq. Aamma malinnaassaagut. Aalajangiusimassaagut. Ineriartornerullu unittuunnginnissaa qulakkiissallutigu. Ataqqinninnissaq pineqarpoq. Nunatsinnut, innuttaasutsinnut, nunallu avannarliit ataatsimoornerini nammineq oqaaseqarsinnaatitaanitsinnut ataqqinninnissaq.

Ataatsimut isigalugu nassuiaammi oqariartuutigineqarpoq nunarsuatsinni pissutsit allanngoriartorfianniittugut, ilutigisaanillu nukittunerusumik, imminut tatiginerusumik, suleqatigiiffiunerusumik, akisussaassuseqarnerusumillu nammineq inissinniarsarisugut.

Ineriartorneq tamanna Demokraatinit tapersorsorparput. Kisianni ineriartornermi tassani aamma isumatusaarluta aalajangiisariaqarpugut, pingaartitat aalajangiusimasariaqarpagut, inuiaqatigiinnitsinnullu pitsaanerpaasussaq eqqarsaatigiuassallutigu.

Taamatut oqaaseqarlunga, Nunanut Allanut tunngasutigut naalakkersuinikkut ingerlatsineq pillugu nassuiaat 2024-2025-mi, Demokraatit tusaatissatut tiguaat.